

UFỌK ABASI KE CORINTH

1 Nwɛd Corinth 11:18-22; 12:1-31; 14:1-40.

QYQHỌ UKPEP-ŃKPỌ 392

Eke Mkparawa

IKỌ IBUOT: “Ekedep mbufo ke ekọm-urua; mmọdo enọ Abasi Ubọñ ke ikpohidem mbufo” (1 Nwɛd Corinth 6:20).

Ufọn Edidiana Kiet

Paul, owo-mbet ekedi ọkwọrọ-ikọ emi ekenyenede nsin-ifik eti-eti. Enye ama enyene mfighe ke esit abañã kpukpru owo, enye okonyuñ edi kiet ke otu ikpọ mme ọkwọrọ-ikọ emi ekedade ikọ Abasi eka mme esen idut. Enye ama enyene Spirit Abasi ke uwem esie, ndien mme owo eke ekekopde ikọ esie ema enyene ubiom-ikpe ke abañã idiok-ńkpọ, enyuñ ebọñ akam eyom erinyaña ukpọñ. Ema etoño ufọk Abasi ke ediwak ebiet.

Satan inyimeke ndiyak mme ufọk Abasi Jesus Christ ekpono Abasi ke emem. Ke ini Spirit Abasi ọtoñoode ndinam utom ke otu mmọ emi enyenede mfighe ke esit ke abañã edikọ mme ukpọñ nno Jesus, Satan ńko ada ubiñoedi.

Ke ini Paul ekewetde ọno ufọk Abasi ke Corinth, enye ama etiñ abañã ediwak nti ńkpọ emi okotibede ke otu mmọ; edi enye ikefepke enyin ke mme ńkpọ oro ekekwañade. Enye ete, “Nkop nte ubahare ke edodu ke otu mbufo.” Enye ete ke mme ńkpọ emi ikpenyeneke ndidu.

Nwɛd Abasi otim etiñ ọno nnyin ete ke edidiana kiet enyene ndidu ke ufọk Abasi man oto do Spirit Abasi anam utom ke otu nnyin. Jesus ama ọbọñ akam ọno mmọ emi etienede Enye, ntem: “Man mmọ kpukpru ekpekam edi kiet, nte Afo, Ete odude mi ke idem, Ami nnyuñ ndude ke Afo; man mmọ enyuñ edu ke nnyin: man ererimbot enim ke akpanikọ ete, edi Afo ọkọdọñ Mi” (John 17:21). Ke ini edidiana-kiet odude ke ufọk Abasi, mme owo eyekut ete Jesus mmọdo ńko.

Edidianare Nkpọñ Mbon Nduime

Ndusuk ini mfina emi osimde ufọk Abasi esikpon tutu ana nte ebin ndusuk owo efep. Paul ama ọdọhọ mme anditiene-Christ emi ekedude ke Rome ete “Ekama enyin ese mmọ emi etode ubahare ke otu mbufo, enyuñ enamde ńkpọ esin owo eduo, minyuñ isañake ikekem ye erikpep eke ekekpepde mbufo ete enam. Edianare ekpọñ mmọ” (Nwɛd Mbon Rome 16:17). Edi mmem-mmem ńkpọ owo ndimen idiok ikọ emi enye esikopde kpukpru ini abañã ńkpọ me owo nsin ke esit esie. Eti usuñ nditre ndiduọ nduk ke Spirit usioño-ndo edi nditre ndika iso nsaña ye mmọ emi enyenede oruk Spirit oro.

Eti Emi Ayararede

Paul ama ọdọhọ mbon Corinth ete ke ini utọ mfina oro odude ke ufọk Abasi, nditọ Abasi enyene ndisoño nda ke se inende. Enye ete: “Eribahare nda ńka-ńka enyene ndidu ke otu mbufo, man eyarare efiok mmọ emi edide ata ikot Abasi ke otu mbufo” (1 Corinth 11:19). Nti owo eyewọrọ eda ke ini ndiqi edibaharede idem mmọ.

Kiet ke otu ubahare ekedi koro ikedighe kpukpru owo ekenim idaha Jesus nte Abasi ke akpanikọ. Edi ata akpan ńkpọ nnyin ndinim nte ke Jesus edi Christ, emi Abasi ọnoedi. Edinam ekededi eke owo minimke idaha Jesus nte Abasi ye odudu Esie ke ufọk Abasi ke ofuri esit enyene ndida ubahare ndi. Mme Oruñ Eke Edukde Isoñ

Ukọbọ ke usuñ isañ nnyin nte mme anditiene-Christ eyeñwam nnyin ndidọdọñ ńkọri ke mbuotidem, edieke nnyin itimde ima Abasi. Afo omokop uwut-ńkpọ emi abañade eto emi adade ekpere akamba inyañ, emi ọkpọsọñ ofum ye akwa oyobio abarade enye. Mme oruñ esie etim eduk isoñ man eñwam eto emi ndisoño nda. Eto eñwen ada ke idak mfut onyuñ ọkọri ediye-ediye; edi ke ini emende se enye odibede ke idak efep, akpa oyobio abara enye ọduok koro mme oruñ esie idukke isoñ. Edieke anditiene-Christ odude ke idara ye ifure kpukpru ini, enye idinyeneke mme oruñ eke edukde

isọñ. Edi edieke enye otim amade Abasi, mme idomo eke etienede enye eyenam enye otim ọsọñ ada ọnọ Christ emi ekedepde enye. Enye eyekeme ndiyọ mmọ.

Ñwede Abasi etiñ emi ọnọ nnyin abañá Jesus: “Ke ini owo osuñide Enye, Enye isuñike mmọ usiene; ke ini Enye ebede ke ndutuhọ, Enye itiñke ikọ ndighe; edi ayak ikọ Esie esin ke ubọk Andikpe edinen ikpe” (1 Peter 2:23). Enye ikoyomke mme unen esie. Enye akayak kpukpru ñkpọ esin ke ubọk Ete, emi ke edikem ini edidade ufen ọnọ mmọ emi ekenamde Christ okut ukut.

Etiñ enọ nnyin ete yak ibiet Jesus. Paul, owo-mbet okoyom ndibiet Jesus, kpa ke mme ñkpọ eke enye okokutde ukut. Enye ama ọdọhọ ete: “Man ñkpọfiọk Enye ye odudu eriset Esie ke udi, ye nsaña ke ndutuhọ Esie, nnyuñ ñkabare ñkpa mkpa eke ebietde mkpa Esie” (Ñwede Mbon Philippi 3:10). Paul ama esitiñ ñkpọ abañá ibuot ikọ emi. Ke ini enye ọnọde ñwede esọk Timothy, enye ọdọhọ ete: “Edieke imede ime, iyeda ubọñ ye Enye; edieke ikañde Enye, Enye eyekañ nnyin” (2 Ñwede Timothy 2:12).

Ñtañidem

Mfina efen ama oduk edi ufọk Abasi ke Corinth koro ndusuk owo ema ekabare etañidem ebaña mme enọ emi Abasi ọkọnọde mmọ. Ekenọ mme enọ emi ndinọ Jesus ubọñ, idighe owo. Ndusuk mmọ ema enyene utibe ifiọk nte mme andikpep, edi akana nte ekpep ebaña Jesus ikpọñ. Ndusuk ekedi mmọ eke ekemede ñdikwọrọ ikọ eti-eti, edi akana nte ekpep mme owo usuñ nte ekemede ndibọ erinyaña. Ndusuk ema enyene enọ ke abañá erikọk-udọñ, edi mmọ ekenyene ndinam ke enyiñ Jesus ikpọñ. Mmọ ikenyeneke unen ndibure mbure. Baba owo kiet ikemeke ndinam ñkpọ nnọ Jesus ibọhọke Spirit Abasi anam ebe ke enye.

Uduọk-mmọñ Edisana Spirit

Enọ Edisana Spirit edi utibe edidiọñ. Odudu emi otode ererimbot efen edi ediduk esit emi ema ekenam asana. Spirit Abasi etiñ ikọ ebe ke idem owo emi ọbọde enọ emi, ke usem emi akananam enye mifiọkke. Emi edi ọyọhọ ifiọk eke ebeñede owo Abasi idem abañá utom Abasi, ndien ndibọ enye edi se iyọhọde ye ubọñ. Edi akananam owo isuhọkede idem nte ke ini enye ọbọde enọ emi. Enye inyeneke ñkpọ ndibure mbaña.

Kpukpru mmọ emi eyomde ndinam utom nnọ Jesus enyene ndinyene ata nsuhọridem. Edieke iyomde ndidi mme ntiense Jesus emi ikutde unen, ana nte iyak ekut uyai Jesus ke nnyin. Mmọ oro nnyin itinide ikọ inọ ibaña Jesus enyene ndifep enyin mmọ ñkpọñ nnyin, nnyuñ ñkere mbaña Andinyaña emi nnyin idade ke itie Esie.

Ke ini Peter ye John ekekọkde owo oro ke Ediye Inua-otop, mmọ edọhọ ete: “Nsinyuñ inam mbufo ewukde enyin ese nnyin, nte edide nnyin ida odudu idem nnyin mme uteñe eke nnyin iteñede Abasi inam enye asaña?” (Utom Mme Apostle 3:12). Mmọ eka iso nditiñ nte ke oto ke mbuotidem ke enyiñ Jesus anam utibe-ñkpọ emi “ke akpanikọ, mbuotidem emi otode ke Enye ama ọnọ owo emi ọyọhọ nsọñidem ntem ke iso mbufo kpukpru” (Utom Mme Apostle 3:16).

Edisana Spirit ke idem Esie ọnọ Jesus ubọñ. Jesus ọdọhọ ete: “Edi ke adañemi Enye oro edidide, kpa Spirit akpanikọ, Enye eyeda mbufo oduk ke ofuri akpanikọ: koro Enye iditiñke ikọ Esiemọ; ... Enye eyenam nnyene Ubọñ” (John 16:13, 14). Kpukpru se nnyin ibọde ito Heaven edi ke ntak ndida nnọ Jesus ubọñ.

Usuñ ndida nnọ Jesus ubọñ edi nditiñ nnọ mmọ efen mbaña Enye, nnyuñ ñkọ mme ukpọñ nnọ obio-ubọñ Christ. Mbubehe nnyin mi ke isọñ edi ndibọp obio-ubọñ Esie. Edieke nnyin mikpenyeneke ñkpọ ndinam nnọ Jesus ke ererimbot emi, Enye akpada nnyin aka Heaven ke ndo-ndo oro nnyin ikọbọde enọ Esie.

Editiñ Ikọ Ke Usem

Okposuk edi nte editiñ ikọ ke usem efen edide ntiense ke abañá Uduọk-mmọñ Edisana Spirit, enam akamba mbuburu ke abañá idiọñ emi. Ndusuk enam editiñ ikọ ke usem efen okpon akan edisana uwem, me enọ odudu ke abañá edinam utom. Ke edinam emi, mmọ ekabare edi mbubik; ndien Satan ndusuk ini esida edinam emi abiaña mme owo esin ke ndinim nsu ke akpanikọ.

Paul, owo-mbet ama ọdọhọ ete ke edi ata akpan ńkpọ nditiń ikọ ke ufọk Abasi ke usuń nte mme owo edifiọkde se etińde. Paul ama ọdọhọ ete ke imọ iyetiń ikọ ition eke mbon efen edifiọkde ikan nditiń tọsin kiet eke owo mifiọkke se ọwọrọde. Ndien enye ńko ọnọ item ete ikusin editiń ikọ ke mme usem. Edi enyene ndinam ńkpọ nnọ Abasi ubọń idighe owo eke etińde. Enyene ndinam kpukpru ńkpọ ke nde ke nde. Nduime ke ufọk Abasi ada but ọnọ utom Christ.

Utom Emi Enyenede Kpukpru Owo

Abasi ọnọ kpukpru nditọ Esie ńkpọ ndinam edi idighe ukem-ukem utom. Paul, owo-mbet ọkọdọhọ ete ke ufọk Abasi edi idem kiet, emi enyenede nsio-nsio ndido ye nsio-nsio utom ndinam. Mme enyin ekut; mme utọń ekop; nnyin ida nnuen-ubọk ituk ńkpọ; ida ibuo ikop utebe; ida edeme itiń ikọ. Nnyin imọfiọk ite ke mme ńkpọ emi edi akpan ńkpọ. Edi iyefiọk ite ke ekpri nnuen-ubọk nnyin edi ata akpan ndido idem ńko, edieke enye enyenede unan ndien nnyin ikemeke ndida enye nnam ńkpọ. Idet ibuo nnyin ekeme nditie nte idighe ata akpan ńkpọ, edi enyene ufọn esie. Edi, edi “ufuhọ-ńkpọ” emi ańwamde ndinam ibuo nnyin okop ufiop; ndien ńwede Abasi etiń ete ke idet ańwan edi “ubọń esie” (1 ńwede Corinth 11:15).

Ke ntre, edieke ndido kiet-kiet eke idem nnyin edide akpan ńkpọ, Paul etiń ọnọ nnyin ete ke ndido kiet-kiet ke idem Christ edi akpan ńkpọ ńko. Nnyin ikemeke ndidọhọ baba kiet ite “Nnyin ikwe ufọn fo.” Ọbọń eyenọ owo kiet-kiet utip nte ekemde ke usuń nte enye akanamde akpanikọ ke ekpri me akamba ńkpọ emi ekenode enye ndinam. Kpukpru mme enọ emi Abasi ọnọde mme owo ndida nnam utom Esie edi akpan ńkpọ; edi Paul ete ke ńkpọ odu eke edide akpan ńkpọ akan mme enọ. Oro edi ata edisana ima Abasi ke esit, nte ewetde ke 1 ńwede Corinth 13, ima emi enyenyene anyan ime, onyũ ọfọn ido; . . . ifibeke ufup; . . . inamke inua, ikohokere idem, inamke ido eke midotke, iyomke ufọn esiemọ, isọpke iyaresit, ikamake udu; Ima idarake se ikwańade, edi adadara se idide akpanikọ; ima ememe kpukpru ńkpọ, ononim se ifọnde ke akpanikọ kpukpru ini, ododoriyenin abańa kpukpru ńkpọ” (1 ńwede Corinth 13:4-7). Edieke kpukpru owo eke edọhọde ete idi anditiene-Christ ekpedude uwem nte mbet emi etemede, ubahare ikpoduhe ke ufọk Abasi.

MME MBUME

- 1 Nso ńkpọ ida edidiọń isin ke ufọk Abasi?
- 2 Nso ikedi kiet ke otu mme mfina ufọk Abasi ke Corinth?
- 3 Nso ke nnyin ndinam ke abańa mmọ emi etode ubahare ke ufọk Abasi?
- 4 Nso ńkpọ ke ndusuk mbon Corinth ekebure ebańa?
- 5 Didie ke Jesus akanam ńkpọ ye mmọ oro ekeduede enye?
- 6 Nso ke enọ nnyin Uduọk-mmọń Edisana Spirit ndida nnam?
- 7 Nso idi idiọń kiet eke enode ke ini nnyin ibode Uduọk-mmọń Edisana Spirit?
- 8 Didie ke Paul akada ufọk Abasi odomo ye ndido idem owo?
- 9 Nso idi mbubehe anditiene-Christ mi ke isọń?
- 10 Nso idi ata akpan ńkpọ ikan “mme enọ”?